

Ningzmingz “Ciengj Bauqva” Angqhoh “Sam Nyied Sam” Bouxcuengh

宁明趣味“抢花炮”欢度壮族“三月三”

Bonjbau siusik (gicej Couh Yi) 4 nyied 10 hauh, gicej bae daengz Ningzmingz Yen Cwngzcungh Cin Yacouh Cunh, yienhciegz yawjngonz le ciengz minzcuz conzdungj dijjuz doxdax gig miz minzcuz conzdungj fungcingz feihdauh ndeu—ciengj bauqva.

Youq aen dieghoengq gvangqlangh 100 lai moux haenx, yungh haujlai fuk geiz hoengz, henj, lamz, heu geij cungj saek humxok gizdieg ciengj bauqva. Ciengj bauqva itbuen guh sam ciengz doxdax, moix ciengz diemj aen bauq ndeu, moix aen bauq gak miz eiqsei. Aen daih’it dwg “bauq ding”, eiqsei dwg muengh ndaw ranz vunz lai hoenghvuengh; aen daihngieh dwg “bauq caiz”, eiqsei dwg muengh fatcaiz baenzfouq; aen daihsam dwg “bauq gviq”, eiqsei dwg muengh ndaw ranz fouqgviq, saedceij vuenyungz.

Ngoenzhaenx banhaet 11 diemjung, Yacouh Cunh geij cien vunz comz youq ciengzdieg ciengj bauqva haenx, vunzlai riunyumnyum sim angqyangz, ciengzmienh gig nauhyied. “Bung!” Aen singyengj le, bauqva mbin hwnj gwnzmbwn bae, gyoengq boux doxdax ciengj bauqva haenx sikhaek riengz gij fuengyiengq bauqva doek roengzdaeuj buet gvaqbae. Ginggvaq song doih vunz geij baez doxciengj doxbeij caeuq ndaw doih doxboiqhab, Cau Yenjfuz Yacouh Cunh bauj gaenj aen bauqva, buet ok henzgyaiq ciengzdieg. Aen loz youq ndaw fwngz boubuengq deng roq yiengj, doxdax ciengj bauqva daeuz neix cij sat.

Doeklaeng bauq daihngieh, daihsam diemjdawz le, daengx mbanj boubaux boubaux, boubaux cungj bae ciengj, youq gwnz ciengzdieg haenx, mwngz gyaep gou, gou laeh mwngz, boubaux riunyumnyum; yienhciegz bouxyawj caemh angqvauvau, nauhyied raixcaix.

Sam ciengz doxdax guhsat le, sam boux ciengj ndaej bauqva haenx, gaem gij ciengjbinj sim diemz lumj dangz nei, youq gyoengq baengzyoux, caencik humxveiz cungqgyang, it loh cuengq bauq, roq laz dub gyong dauqma ranz, yawjraen boubaux cungj sim angq naj riu,vuenheij raixcaix.



▲ Gij ciengj boux ciengj ndaej bauqva haenx.



▲ Yaek ciengj bauqva lo.

◀ Daihgya itheij ciengj bauqva.



▲ Hekyouz ngonzyawj yotfaiq.

Sanhgyangh: Baengh Minzsuz Daegsaek Byaijok Diuz Roen Bangcoengh Ndeu

三江：依托特色民俗走出一条扶贫路

4 nyied 14 hauh, hekyouz youq Sanhgyangh Duncuz Swciyen Linzhih Cin Cwngzyangz Bazcai ngonzyawj youzcet. Gaenh geij bi neix daeuj, aen yienh neix baengh gij giuzndojfwn, yotfaiq, ngaizbakranz, gofoux daengj daegbied minzsuz caeuq swnghdai gingjsaek swhyenz, vatcimh deihfueng vwnzva daegsaek, haenqrenz hengzguh lijyouz bangcoengh canloz, byaijok diuz roen cingcinj bangcoengh vutgungz ndeu, 2016 nienz 1 daengz 3 nyied, daengx yienh gungh ciepdaih hekyouz daengz 75 fanh vunzbaez. (Vuz Lenyinh/吴练勋)

Lozcwngz:

“Gyaeqnding Cienz Cingz” Raeuj Sim Bouxgeq

罗城：“红蛋传情”温暖老人心

“Sam nyied sam” geizgan, Lozcwngz Mulaujcz Swciyen Mulaujcz Bozvuzgvanz banh angqhoh “gyaeqnding cienz cingz” minzsuz vwnzva hozdung, gyoengq lwgsau Mulaujcz daenj buhvaq ngoenzciet, fwngz gaem va’nding caeuq gyaeqnding, naj riunyumnyum ciep hek daeuj, caemhcai soengq gyaeqnding caeuq hohfuk ngoenzciet hawj gyoengq boubuxgeq daeuj camgya hozdung haenx, itheij faenyengj gij angqyangz ngoenzciet “sam nyied sam”, yungh caencingz raeuj sim boubuxgeq. (Mungz Cwngghsw/蒙增师)



◀ Faen ndaej gyaeqnding sim raeuj lai.